

Акафист
преподобному Роману Сладкопевцу

Празднование 14 (1) октября

Кондак 1

Избранный подвижнике и земный ангеле Христов,
Божественными добродетельми Духа измлада
украсився, Романе премудре, пением прекрасным
Церкве Христовы служитель был еси, яко да вопием
ти:

Радуйся, сладкопевче Романе, красото церковная.

Икос 1

Ангельское житие возлюбил еси от юности, ум на
Божественная возвел, временная и земная
пренебрегл еси, тем убо вселися в тя Святыи Дух,
Егоже благодатию украшен еси, сего ради с любовью
вопием ти сице:

Радуйся, чистотою Ангелом уподобился еси.

Радуйся, постом и бдением безстрастия достигл еси.

Радуйся, светильниче Божественнаго света.

Радуйся, молитв благовонное кадило.

Радуйся, грамоте необученный, разумом стремивыйся
к Богу.

Радуйся, добрыми делы премудрыя превосходивый.

Радуйся, сладкопевче Романе, красото церковная.

Кондак 2

Видя сердца твоего благое намерение, Господь
предначерта узкий и тернистый путь твоего спасения.
Темже иго Христово благое и легкое усердне
восприяв, смирен и послушлив был еси, воспевая всех
Творцу и Богу: Аллилуиа.

Икос 2

Разум Божественных Писаний истинною премудростию стяжав, что по апостолу первее чиста есть, потом же мирна, кротка, благопокорлива, исполнися милости и плодов благих, несумненно и нелицемерно. Мы же, дивящися чистоте твоей, воспеваем:

Радуйся, на Бога Промыслителя всю надежду возложивый.

Радуйся, токмо Его благоволения взыскавый.

Радуйся, в послушании усердно трудивыйся.

Радуйся, в сердце имевый страх Божий.

Радуйся, житием добродетельным на земли просветивыйся.

Радуйся, за сие любовь Божию на небесех снискавый.

Кондак 3

Силою любве утверждаяся, поревновал еси евангельское житие стяжати по образу преподобных отцев. Егда же даде ти Господь разумение сего благоугождения, воспел еси со умилением: Аллилуиа.

Икос 3

Имея крепкую веру во благое промышление Божие о спасении человека, притекл еси к честному образу Пресвятыя Богородицы, сопредсташа в церкви Влахернстей, и смиренно молил еси Владычицу, да управит путь твой. Мы же, видяще твое неотступное упование на милость Царицы Небесныя, поем ти:

Радуйся, Божия Матере верное и возлюбленное чадо.

Радуйся, силы Ея священнаго покрова тайное постижение.

Радуйся, Заступницы Усердная благоговейный почитателю.

Радуйся, теплая в ночи молитвы к Ней слезно возносимый.

Радуйся, тако утешение в сердце своем обретый.

Радуйся, сладкопевче Романе, красото церковная.

Кондак 4

Бурю многих бед, зависти ради за усердие к послушанию претерпел еси, благий. Обаче за поношение и уничижение воздавал еси кротостию и смирением, мы же мнозе дивящиеся незлобию и терпению твоему взываем: Аллилуиа.

Икос 4

Слыша и видя премногую добродетель твою, возлюбил ты святейший патриарх, даде с клиром ти равную часть, мы же о сем веселящиеся глаголем сице:

Радуйся, всем сердцем Господа возлюбивый.

Радуйся, посрамление завистное приемый в навечерие Рождества Христова.

Радуйся, пред иконою Пресвятыя Богородицы утешение взыскавый.

Радуйся, кротостию уничижение победивый.

Радуйся, явивый сердечная простоты образ светлый.

Радуйся, умягчивый сердца обидчиков твоих.

Радуйся, сладкопевче Романе, красото церковная.

Кондак 5

Богопесненную любовь и сердце чистое к достижению небеснаго отечества, яко светильник, во уме твоем выну содржа, тою прославил еси Небеснаго Отца, воспевая Ему: Аллилуиа.

Икос 5

Видяще, о пречудне Романе, любовь твою к Богу, юже в сердце твоём выну храниму, сию созерцающе сице рцем вси:

Радуйся, трость песнописца послушная, в руке Христове содержимая.

Радуйся, единого Христа от сердца возлюбивый.

Радуйся, в радость Господа вшедый.

Радуйся, Тому единому всею душею прилепивыйся.

Радуйся, сладостями духовными нас насыщай.

Радуйся, возлюбленный к Богу о нас предстателю.

Радуйся, сладкопевче Романе, красото церковная.

Кондак 6

Проповедник неоскудеваемая благодати и милости Божия явился еси ты, блаженне, егда от Царицы Небесныя во сне приял свиток книжный на снадение: тем убо умудрен, нача разумно пети во славу Божию, святым же писати похвальная, взывая с верою: Аллилуиа.

Икос 6

Воссиял еси аки звезда многосветлая, исполнившись премудрости великия, ибо Владычица, яко некогда Сын Ея Своим апостолом, отверзла тебе ум к разумению Писаний, сего ради ублажаем тя, зовуще:

Радуйся, любве евангельския сокровище.

Радуйся, Духа Святаго вместилище.

Радуйся, от Девы Богоблагодатныя дерзновение приемый.

Радуйся, благодарение от сердца чистаго Наставнице своей возносивый.

Радуйся, сладость отречения воли своея познавый.

Радуйся, за кротость и смирение великий дар Божий приявый.

Радуйся, сладкопевче Романе, красото церковная.

Кондак 7

Хотяще вознести достойное благодарение Царице Небесней, возшел еси, Романе блаженне, на амвон церковный и воспел гласом сладким кондак свой, глаголя: Дева днесь Пресущественнаго рождает. Тем и мы Пречистей воспеваем: Аллилуиа.

Икос 7

Дивная звезда явился еси ты, сладкопевче преблагий, украшение изящное Церкви Христовы. Давидову кротость, Иаковле беззлобие и терпение Иовле стяжал еси, мы же вопием ти:

Радуйся, милости Божия стяжателю.

Радуйся, к Богу присный о нас предстателю.

Радуйся, ангельским пением просветивыйся.

Радуйся, лучезарный светильниче.

Радуйся, непоколебимый столпе веры Христовы.

Радуйся, сладкопевче Романе, красото церковная.

Кондак 8

Вси же видяще и слышаще, удивишася, яко течаше от уст твоих, аки река, премудрость. Постыдишася же клирицы, оскорбившие тя, досаждаху о простоте и невежестве, и покаявшеся припадоша к ногам твоим, прощения просяще и славяще Бога, поя Ему: Аллилуиа.

Икос 8

Весь огнем Божественная любви исполненный, в терпении стяжав Дух Святой, по слову Евангелия

Христова. Мы же, любовь твою побеждаем,
дерзаем звать тебе такова:

Радуйся, яко дивный образ Отца Небеснаго в себе
явивый.

Радуйся, братию враждовавшу на тя, любовь
Христовою возлюбивый.

Радуйся, благая за злая воздававый.

Радуйся, пример братолюбия христианскаго всем нам
оставивый.

Радуйся, злых приводяй к постыжению.

Радуйся, скорбящим подай утешение.

Радуйся, сладкопевче Романе, красото церковная.

Кондак 9

Все естество человеческое и лики Ангелов восхваляют
тя, премудре отче, яко послушник, смирения
исполненный, приял еси блаженный путь Христов,
водворися в Царствии Небеснем, поюще: Аллилуиа.

Икос 9

Вития многовещанная не довлеют изглаголати
чистоту духовную, юже имел ты, блаженне Романе; и
нас научи вере крепцей и безропотному послушанию,
с любовью зовущих ти:

Радуйся, паствы твоея изрядный послушнике.

Радуйся, Ангелов собеседнике.

Радуйся, алчущих жизни вечныя питателю.

Радуйся, мудрых словес насадителю.

Радуйся, умильно Божию славу воспевай.

Радуйся, сладкогласную струну Божественнаго дара
приемый.

Радуйся, сладкопевче Романе, красото церковная.

Кондак 10

Спасти хотя род человеческий, верный путеводитель явился еси, дивно возглашая славу Божию. Мы же, внимая слову мудрости твоея, с веселием прославляем Господа, воспевая: Аллилуиа.

Икос 10

Царя Небеснаго, Егоже славословят Херувимы и Серафимы, житием, верою и любовью всеусерднейший служитель был еси, преподобне, яко крин благоуханный, со всеми избранниками Пречистыя Богородицы у Престола Всесвятыя Троицы предстал еси, тем радостно зовем ти:

Радуйся, благий ходатаю о нас ко Господу.

Радуйся, молитвенниче пресветлый и прелюбимый.

Радуйся, яко равноангельную красоту стяжал еси.

Радуйся, яко нищетою духовною обогатился еси.

Радуйся, яко разум свой ко Господу отверзл еси.

Радуйся, сладкопевче Романе, красото церковная.

Кондак 11

Пение умиленное приносим ти, скорому помощнику в нуждах и печалех всем, к тебе с верою и любовью притекающих. Тем же твоими песнопеньми в Церкви Божией прославляется Бог, Дивный во святых Своих, зовущих непрестанно: Аллилуиа.

Икос 11

Яко светлейший светильник и молитвенник явился еси, Романе богоблаженне. Ныне Владыце всех предстоя и дерзновение к Нему стяжав, моли о нас, совершающих светлую память твою, зовуще:

Радуйся, Богу единому послуживый.

Радуйся, вся заповеди Божия исполнивый.

Радуйся, обителей Небесных удостоивыйся.

Радуйся, горния славы приобщивыйся.

Радуйся, гласе благознаменитых словес.

Радуйся, в песнопениях богослове сладкозвучный.

Радуйся, сладкопевче Романе, красото церковная.

Кондак 12

Благодати Божия сокровища наследовал еси,
Богородицу Марию богомудра имел еси Учителя,
вразумляющу тя и научающу пети: Аллилуиа.

Икос 12

Поюще твое достохвальное житие на земли, радостно
славим Дивнаго во святых Своих Царя Небеснаго.
Того благодатию в селениях праведных ныне
ликуеши, идеже зриши славу Божию нескончаемую.
Мы же умильно воспеваем ти:

Радуйся, яко красоту и славу мира сего отрясл еси.

Радуйся, яко душу твою вперил еси к горнему
званию.

Радуйся, яко твоих глагол вещание Вселенную
исполни.

Радуйся, научаяй знанию спасительному всех.

Радуйся, златокованная трубо, славу Божию со
ангелы возвещающая.

Радуйся, Богом увенчанный, в молитвах своих нас не
оставляющий.

Радуйся, сладкопевче Романе, красото церковная.

Кондак 13

О, преблаженне и Богоносне отче Романе! Приими
сие малое молитвенное приношение наше, и с
Пресвятою Владычицею принеси молитву ко Господу
Богу, да избавит нас от всякого вреда и скорби, и

сподобит Своего Небеснаго Царствия, идеже вси, присно торжествующе, немолчно воспевают: Аллилуиа.

(Этот Кондак читается трижды, затем Икос 1 и Кондак 1)

Икос 1

Ангельское житие возлюбил еси от юности, ум на Божественная возвел, временная и земная пренебрегл еси, тем убо вселися в тя Святыи Дух, Егоже благодатию украшен еси, сего ради с любовью вопием ти сице:

Радуйся, чистотою Ангелом уподобился еси.

Радуйся, постом и бдением безстрастия достигл еси.

Радуйся, светильниче Божественнаго света.

Радуйся, молитв благовонное кадило.

Радуйся, грамоте необученный, разумом стремивыйся к Богу.

Радуйся, добрыми делы премудрыя превосходящий.

Радуйся, сладкопевче Романе, красото церковная.

Кондак 1

Избранный подвижниче и земный ангеле Христов, Божественными добродетельми Духа измлада украсився, Романе премудре, пением прекрасным Церкви Христовы служитель был еси, яко да вопием ти:

Радуйся, сладкопевче Романе, красото церковная.

Молитва

О, преблаженне отче наш, Романе Сладкопевче! Призри от горния славы на нас, смиренных и немощных, твоя помощи и утешения просящих. Приникни к нам благосердием твоим и помози заповеди Господни непорочно сохранять, веру

православную крепко содержать, покаяние во гресех наших усердно Богу приносить.

Научи нас, уневестившихся Христу, работати Ему со страхом и радоватися с трепетом. Избави нас от печали и уныния, отжени от нас гордость и славолюбие, да воспоем славу Божию, да восхощем токмо славы небесныя.

О, святыи отче, всели в нас любовь нелицемерную к ближним, послушание безропотное начальником и страх Божий в сердца наша. Даруй познати сладость отречения воли своея, верой крепкой во благое Промышление Божие о спасении человека освяти души наша. Низпосли нам благословение от Господа, да понесем благое иго Христово в долготерпении до конца дней наших, да сподобимся с мудрыми девами внити во брачный чертог Жениха своего Небеснаго и купно со Ангелами воспевати славу величия Его, Отца и Сына и Святаго Духа во веки веков. Аминь.